



NBC BAI NEK BILONG HUSAT ?



STQRI LONG PES 11.

Poto i soim Anaunsa Endora na Diba long NBC, Milne Bay.

LUKIM INSAIT:

Tok Gris Long Bia i Tambu	3
Redi Long Nupela Gavman	3
Oi Plisman Askim Yu Engliken na Katolik	4
Sios Wok Long Bung Gen	5
Oi Meri i Woda Nau	7
Stori Tumbuna	9
NBC Na Bisnis	11
Fantom	14

Yunaitet Pati tok bek long Pangu platform



Bihain Sir Tei Abal i bin kam bek long Japan, em i bin lukim dispela platform o as tingting bilong Pangu Pati na em i bekim tok olsem na autim tingting bilong em, olsem lida bilong Yunaitet Pati. Em i Oposisen pati bilong gavman, na em i wok long sakim sampela aidia bilong gavman sapos em i no laikim. Olsem bai gavman i ken tingting gut, na sapos tok bilong oposisen i no tru, orait, gavman i ken go het bihainim tingting bilong em yet.

Sir Tei i lukim gut platform o as tingting bilong Pangu na em i tok olsem: Mi hepi long lukim olsem wanem Pangu nau i bihainim planti tingting mipela Yunaitet Pati i bin autim 5-pela yia bipo. Pangu i promisim planti samting. Bipo em i bin mekim olsem tu, tasol insait long 5-pela yia em i no bin bihainim ol promis bilong em. Olsem na mi laik askim: Inap nau ol i no inap bihainim ol promis.

Olsem wanem? Nau bai ol i stat long bihainim? Mi no save. Mi laik lukim pastaim.

Sir Tei i tok em i no egens long ol bikpela tok long platform tasol em i pilim, dispela platform i gat planti hul long en. Platform ya i sarap na i no autim tok long planti samting. Em i toktok liklik tasol long ol yangpela pipel - na inap nau em i no bin helpim ol liklik. Pangu i laikim bai olgeta manki i mas kis-

imskul. Mipela Yunaitet Pati, mipela tu i laikim dispela. Tasol nogut yumi mauswara nating. Yu lukim gavman bilong nau. Em i bin givim liklik nating (inap K196,000 tasol) long skulim ol bikpela manmeri. Em i pipia nating.

Sir Tei i tok: Pangu platform na platform bilong Yunaitet Pati klostu i wan-kain. Pangu na mipela wantaim i laikim dispela samting: bai ol pablik sevan i no ken kisim wok bilong ol bikos ol i bilong wanpela politikal pati. Na tu mipela i laikim dispela aidia long gavman i mas baim ol samting bilong wok bilong em, long ol lokal kampani na i no long ol ausait kantri.

Tasol mipela Yunaitet Pati i laik tok olsem: Promisim wanpela samting, em i isi samting. Tasol mekim tru dispela samting, em i no isi.

pablik sevan na ileksen

Memba bilong Yunaitet Pati bilong Westen Hailans, em Mista Raphael Doa, i bin bringim wanpela mosen bipo long palamen long wokim sampela lo bai ol manmeri i wok long gavman (em yumi save kolim pablik sevan) i ken go insait tu long ol ileksen bilong bikgavman na tu bilong provinsal asembli. Inap nau lo i tok, sapos wanpela man o meri i holim wok insait long wanpela ofis o dipatmen bilong gavman, em i mas pinistaim long dispela wok, na bihain tasol em inap sanap olsem kendidet long ileksen.



save long em i laik resis insait long wanpela ileksen bilong bikgavman o bilong provins.

(2) Em i ken kisim ileksen liv. Tasol em i no ken kisim pe long dispela liv.

(3) Taim em i gat dispela ileksen liv, em i no ken yusim ol ofis o ka o samting bilong gavman bilong helpim em long winim ol vot.

(4) Long dispela taim bilong liv, em i tambu long painim narapela wok i gat pe bilong en.

(5) Sapos wanpela pablik sevan i kalapim ol dispela lo, em inap long raus long wok bilong em insait long gavman.

(6) Sapos em i no win long ileksen, orait gavman i mas givim bek wok long em.

Na mi laik bai palamen i orait long wanpela lo i gat dispela ol poin insait long en:

(1) Pablik Sevan i mas tok

PATI PROMIS LONG HELPIM OL MISIN TISA

Mista Raphael Doa, memba bilong Westen Hailans, i bin tok long Port Moresby, em i wari na em i sori long ol misin tisa. Em i pilim gavman i no bin mekim stret long ol.

Em i olsem: Sampela yia bipo, ol misin tisa i bin join na kam insait long Nesenel Sevis bilong gavman olsem bai ol i ken kisim pe long han bilong gavman olsem ol arapela tisa. Bipo ol misin i mas peim ol tisa; nau gavman i peim. I gutpela. Tasol long dispela taim ol i kam insait, gavman i bin tok ol misin tisa i mas kam insait nau olsem nupela tisa. I olsem: olgeta planti yia ol i bin tis, em nau i no kaun insait long nupela sevis. Ol i stat nupela nau. Tasol olgeta yia wanpela gavman tisa i bin tis, em i kaun.

Nau wanpela hevi i kamap long dispela pasin. Planti taim wanpela misin tisa i bin tis planti yia olsem wanpela gavman tisa, tasol em i no inap kisim liv i wankain na wanskel long em - long wanem ol dispela yia em i tis long misin tasol ol i no kaun.

Ol misin tisa i bin bringim dispela wari long Komi-

sina bilong Tisa Sevis. Tasol em i no bin bekim tok. Seketeri bilong Edukesen i bin bekim tok olsem: em i sori, tasol lo i tok ol misin tisa bilong bipo i no skel wantaim ol gavman tisa. Na taim ol i kam insait long sevi bilong gavman, ol misin tisa i orait long dispela samting. Olsem na ol i no gat tok.

Mista Doa i tok: em i tru. Lo i tok long ol misin tisa bilong bipo i no skel wankain long ol gavman tisa. Em i tru. Tasol Mista Doa i pilim em i no stret. Na em i promis long Yunaitet Pati bai pait long stretim dispela samting. Long wanem, ol i pilim ol dispela tisa bilong misin bilong bipo i bin mekim bikpela na gutpela wok long helpim go het bilong dispela kantri. Na em long taim i no gat dispela nesenel sevis bilong ol tisa.

Mista Doa i tok: Edukesen bilong yumi i go antap pinis nau bikos em i sanap antap long dispela wok bilong ol misin tisa bilong bipo. Ol i bin hatwok tru insait long bikbus. Na ol yet i bin statim dispela pasin bilong skulim yumi. Mi ting gavman i no ken lusim hariap tingting long dispela gutpela wok.

Bipo long woa i gat planti provins i no gat skul bilong gavman olgeta.



MASKI INDONESIA

OFISA

Mista Paul Langro, memba bilong Wes Sepik, i bin tokaut egens long dispela aidia long kisim sampela ofisa bilong Indonesia long kam insait na skulim ol ami bilong mipela.

Mista Langro i tok: sapos ol ofisa bilong Indonesia i stap hia insait long Papua Niugini, ol inap long painimaut na mumutim olkain tok save long kantri bilong mipela.

Mista Langro i tok: Mipela i no save tumas long Indonesia yet na trupela tingting bilong em. Mobeta yumi skruim dispela pasin i go, long Australia i skulim ami bilong mipela. Em yet i bin wokim ai bilong mipela na em i bin givim olkain gan samting long mipela. Mipela i save pinis long tingting bilong Australia.



HUSAT I GUTPELA WOKMAN?

Planti kampani long Papua Niugini ol i bin makim sampela Papua Niugini man long mekim wok olsem stiaman bilong kampani.

Tasol planti kampani i tokaut long sampela hevi i pasim rot long makim planti Papua Niugini moa i kamap stiaman bilong kampani. Ol i ting i gat tripela kain pasin yumi mas senisim: Pasin bilong senis long wok, na pasin bilong les, na pasin bilong pret.

Planti wokman ol i laik senis senis long kampani. Sampela ol i no laikim pe ol i kisim. Na ol i ting ol inap kisim planti pe moa long narapela kampani. Olsem na dispela kain wokman em i senis senis long planti kampani.

Na sampela wokman ol i kamap les long wok ol i mas mekim. Na dispela lain man ol i ting: "Sapos mi lusim dispela kampani na mi go long narapela kampani, bai mi inap i stap bel hepi na wok i isi tumas." Dispela kain tingting em i skruim hevi long kampani na wokman wantaim. Long wanem: Sapos wokman i lusim kampani, orait kampani i mas painim narapela wokman na skulim em long mekim wok. Na dispela wokman em i lusim kampani em i mas painim narapela kampani na wok gen long kisim save long mekim wok long dispela arapela kampani.

Yumi save planti wokman ol i no wok strong tumas. Nogat. Ol i mekim liklik wok na ol i kisim win na malolo na ol i wok liklik moa i go i go. Na dispela pasin i no helpim Papua Niugini i kamap strong. Kampani i mas baim olgeta aua bilong wokman. Tasol sapos wokman i no wok strong long olgeta aua, orait pe em i kisim em i no karim planti kaikai.

Yumi krai planti long bikpela pe bilong baim kain kain samting long stua. Tasol as bilong bikpela pe i olsem: Wokman long kampani i no save wok strong, na pe bilong ol wokman em i go antap moa. Na yumi yet i mas tromoi bikpela mani bilong baim dispela kain kain samting.

Sapos wokman long kampani em i wok strong long olgeta aua, orait pe em i karim bikpela kaikai, na pe bilong wokim dispela samting bilong kampani em i go daun liklik. Pasin bilong wok strong em i helpim wokman na i helpim kampani na i helpim yumi olgeta.

Bilong mekim gut wok, yumi no ken pret long wok. Stiaman bilong kampani em i no gat wanpela buk i gat lista long olgeta wok em i mas mekim. Em i no inap bihainim wanpela kain lista olsem. Nogat. Long olgeta de, nupela kain hevi i save kamap. Sapos stiaman i pret long skelim hevi na painim rot bilong pinisim dispela hevi, orait kampani inap pundaun.

Man i pret long skelim hevi na painim rot bilong daunim hevi, em i no inap i kamap stiaman bilong narapela man. Man i save skelim hevi na painim rot bilong daunim dispela hevi, em bai i kamap stiaman na lida bilong planti arapela man. Na dispela kain man em i helpim tru kantri bilong yumi i go het.

Tambuim tok gris long dringim bia

Mista Pita Lus, Minista bilong bosim ol lo bilong baim na salim ol strongpela dring, i bin tok long 27 Januери, Eksekyutiv Kaunsil bilong gavman i bin vot orait long tambuim olgeta tok gris i save pulim ol pipel long dringim bia.

Dispela kain tok gris yumi save lukim long planti niuspepa.

Mista Lus i tok, lo bilong 1973 i bin givim strong long gavman long tokim Gavana Jeneral long tambuim tok gris long ol strongpela dring olsem wiski na bakardi samting. Nau gavman i tokim em long tambuim tu tok gris long olkain bia.

Long 1971 i gat wanpela komisin i bin raun long kantri na glasim gut ol pasin bilong dring na wari na trabel i save kamap long en. Na long dispela taim yet ol i bin tokim gavman, em i gutpela samting sapos

gavman i tambuim olkain tok gris long pulim ol pipel long strongpela dring. Tasol long dispela taim nupela faktori bilong wokim bia i bin stat - em Swan na San Miguel Brewer - na olsem gavman i no laik tambuim dispela tok gris long bia, olsem bai nupela kampani i ken stat gut.

Kabinet bilong Praim Minista i ting em i longlong samting sapos gavman i wokim olkain lo bilong tambuim dring na ol aua bilong dring. Tasol em i mas resis wantaim dispela pasin bilong ol bia kampani long pulim ol pipel i dring moa moa yet. I olsem wanpela han i pasim

narapela han na em i longlong.

Mista Lus i tok, gavman i givim ol bia kampani taim inap wan mun yet long rausim ol dispela tok gris long ol niuspepa na tu long ol muvi na long ol bikpela sain yumi ken lukim long ol banis na ol rot. Ol trak bilong bia kampani tasol i no gat tambu long karim nem bilong em.

Mista Lus i tok tu, em i ting bai planti pipel moa i belgut tru long harim dispela tok long tambu long tok gris long bia. Inap long sampela mun nap planti hetman na pipel bilong ol sios na komyuniti i bin toktok wantaim em na wantaim ol arapela minista long putim dispela tambu insait long lo bilong Papua Niugini.

gavman redi long bosim kantri taim nupela gavman i no wok yet

Dispela yia yumi gat ileksen namba wan taim aninit long independens bilong yumi. Dispela gavman bilong nau em i namba wan gavman long independen Papua Niugini. Inap nau yumi no save yet long pasin bilong wanpela gavman i givim pawa bilong em i go long neks gavman, bihain ol ileksen i pinis. Olsem na gavman nau i bin makim wanpela komiti bilong mekim dispela wok. Dispela komiti i olsem bris namel long olpela na nupela gavman.

I olsem tasol: bihain long ileksen ol nupela memba bilong palamen ol i kam long Moresby. Na namba wan samting, ol i mas makim wanpela man olsem praime minista bilong kantri. Makim pinis, orait olpela praime minista na gavman bilong em i pinis nau. Tasol nupela lain memba bilong palamen i mas wok sampela de yet bilong makim ol minista bilong nupela gavman, na spika bilong palamen na olkain nambaman olsem. Insait long dispela tripela de samting bai no gat ol

minista yet na i no gat gavman bilong ranim kantri yet. Olsem na praime minista i bin makim wanpela grup spesel pipel bilong ranim kantri long dispela taim.

Em hia ol man gavman i makim long dispela wok:

Mista Phillip Bouraga bai siaman bilong dispela grup.

Em i makim dipatmen bilong dispela grup.

Mista Rabbie Namaliu bai siaman bilong Pablik Sevis Komisin.

Em i makim olgeta dipatmen na wokman bilong gavman.

Mista Tony Elly bai em i klak bilong palamen.

Mista Christopher Talie bai em i makim ofis bilong gavana jeneral.

Mista Paul Bengo bai mekim wok bilong namba wan seketeri.

Em i makim ofisa bilong praime minista na i bosim wok politik.

Mista James Mileng, olsem hetman bilong bosim ileksen, em bai sambai long wanem ol dispela samting bai kamap long hap taim namel long olpela na nupela gavman.



WOK LAIBRERI PUNDAUN NAU

Ol memba bilong Papua Niugini Laibreri Asosiesen i kirap nogut long lukim planti laibreri moa insait long Papua Niugini i no go het moa. Planti i bagarap tasol i stap.

Eksekyutiv Kaunsil bilong gavman i bin makim wanpela Laibreri Kaunsil long Januери 1975. Tasol inap long tupela yia ol i bin holim wanpela miting tasol, em nau tasol long sampela wik i go pinis. I luk olsem gavman i no tingting planti long dispela wok bilong laibreri.

Nau nupela tingting i bin kamap long gavman: larim ol wan wan provinsal gavman i mekim dispela wok laibreri long provins bilong ol yet. Em samting bilong ol. Tasol Laibreri Asosiesen i pilim wan wan provins bai no gat inap mani bilong ranim gut dispela

(Lukim pes 6)

PAS I KAM LONG OL PIPEL

RASKOL LONG TAUN

Dia Edita - Em nau mi laik autim wari bilong mi. Wari bilong mi i go olsem. Yes ol brata na susa, mi stap long Lae na mi save lukim ol man bilong hap bilong mi na ol man bilong narapela provins i save raskal long taun.

Long san ol i save spai o lukluk long ol samting olsem: klap, stua, hotel, motel, na beng na ol opis bilong gavman na plenim tingting olsem wanem bai ol i go insait long dispela haus. Long nait bai ol i go brukim dispela haus na stilim mani o sampela gutpela samting na paitim man kilim man ol bagarapim ol meri na planti ol narapela samting.

Dispela ol man i kam long planti hap bilong Papua Niugini na taim ol i bung ol i gat planti kain raskol i save kamap long ol man i lusim ples na go raun nating long taun. Na ol standet 6 dropaut, Fom Fom 2, Fom 4, na ol yunivesiti studen em ol i no gat wok na raun nating long taun.

Plis gavman i mas traim na rausim olgeta man i save raun nating long ol taun bilong yumi PNG. Sapos yupela i wok long lusim ol, bai ol i ting olsem "Ha, mipela i wokim samting na ol i no save painim mipela." Dispela kain pasin i save kamap long planti hap bilong PNG.

Yes, ol brata na susa, yupela i ting olsem wanem long dispela: mani i no stap long taun tasol. Mani i stap tu long ples bilong yumi. Sapos yu sindaun gut long ples na wokim sampela bisnis bai yu winim ol man i save wok long taun. Bai yu kisim K50 o K60 long wan wan wik. Ol man i wok long gavman i save kisim olsem tasol long fotnait.

Bilong wanem yu lusim ples na papamama bilong yu? Papamama em i namba wan samting. Yu ken tingting sapos tupela i

lapun husat bai helpim tupela? Na traim na i go bek long ples na helpim papamama, maski long raun nating long taun na pinisim mani bilong wantok bilong yu. Sapos yu husat i wari, bekim pas tasol na i go bek long ples bilong yu.

Michael Yambunmari,
Lae.

NO GAT RONG LONG SPAKMAN

Dia Edita - Mi laik bekim pas bilong tupela susa, em long Betty K. na Rossella K. Tupela i tok spakman i kraik long Haus Sik. Ating em i no stret tumas.

Man em i dring long mani bilong em yet. Na sapos em i pilim pen, na i go long haus sik, yupela ol nes i mas helpim em.

Em i wok mani bilong yupela. Yupela i save kisim pe long dispela kain wok.

Mi laik tokim yutupela susa, dispela kain tok olsem: DRING NA DAI I GO. Ating em i no stret tumas long yupela ol nes bai yusim i go long sikman.

Ating yutupela i mas tingting gut na raitim dispela pas bilong yutupela.

Const. I. Kaumu,
Port Moresby.

RAUSIM BOL TU

Dia Edita - Mi laik bekim tok bilong wantok Mista Tago. Brata mi no save long Tok Inglis, tasol sampela man ol i harim dispela nius i kam long N.B.C. na mi harim.

Mista Tago i tok long pasim bel bilong ol mama husat i gat planti pikinini. Na brata, mi bin lukim potto bilong yu long niuspepa na mi ting dispela man em i no wanpela manki nating.

Em i wanpela bikpela man. Tasol, em i no tingting gut na mekim dispela tok long pasim bel bilong ol mama hariap.

Brata, yu no ken tok long ol marit tasol. Sapos yu laik orait, tokim ol man i gat planti pikinini i ken

rausim bol bilong ol tu. Nogat, brata yu mas tingting gut na skulim ol long yusim gut ol samting God i givim yumi pinis. God i givim planti gutpela samting long yumi.

Brata yu harim, mi kaunim ol samting God i givim yumi. Mi no mas kaunim olgeta samting tasol, mi laik tokim yu, ol samting i stap long bodi bilong manmeri i gat wok long en. Tasol wanpela samting God i givim yumi em i bikpela long ol arapela samting. Em i tingting.

God i givim tingting long man, orait tokim ol manmeri long we bilong yusim dispela tingting na wokim gaden o wok bisnis long kisim mani bilong lukautim pikinini wantaim famili.

Sapos yu ting, dispela we em i hatwok tumas. Na yu ting, isi we long pasim sit bilong ol meri, orait, tokim man bilong en long katim bol bilong em tu.

Sori brata, mi no save rait long tok Inglis na mi raitim dispela tok bekim i go long tok pisin Wantok. Na sapos yu save kisim niuspepa long tok pisin orait lukim dispela na harim gut. Em tasol.

Alphonse Waliki,
Kagua/S.H.P.

Dipatmen bilong ol plisman i laik save long aidia bilong yu long ol plisman. Wan wan taim plis dipatmen bai askim ol rida wanpela samting na em i laik bai yu bekim tok na salim i kam long WANTOK.

Mipela bai givim pas bilong yu long plis hetkota. Na sampela gutpela pas tru mipela bai prinim tu hia insait long "Pas i Kam Long Ol Pipel."

Orait, em hia askim bilong ol plisman dispela taim:

SAPOS YU SPAK NA PLIS I KISIM YU, YU TING OL I MAS MEKIM WANEM SAMTING LONG YU?

EDUKESEN FI GO WE

Dia Edita - Mi gat wanpela toktok olsem wanem ol komyuniti skul o haiskul. Sapos yumi ol papamama i peim skul fi i save go long gavman o long skul? Sapos i go long skul ol i save yusim long wanem kain wok tru?

Ating ol i save salim i go long edukesen bot P/C fi mi save em i bilong skul.

John Mohe,
Buin/N.S.P.



OL MEMBA WESTIM MANI

Dia Edita - Nau mi laik autim wanpela tingting bilong mi long Wantok Niuspepa. Ating dispela tingting mi i gat long en, i no long mi tasol. Nogat. Ating planti wokman bilong gavman, na manmeri long nambaut tu i gat dispela tingting ol memba i save mekim.

Dispela tingting bilong mi i go olsem. Long maus bilong yupela ol memba na gavman, yupela i save tok, long kantri bilong yumi long Papua Niugini, yumi i sot long mani bilong kirapim kantri na kain kain bisnis na mekim wok insait long dispela yangpela kantri bilong yumi.

Dispela tok yupela memba yet i save autim long ol pipel bilong dispela kantri bilong yumi. Yupela i save tokim mipela, nau i no taim bilong slip, kirap na taitim bun na wokim gaden planim kopi na kain kain samting bilong pulim mani na kirapim ples bilong yumi. Yupela i save tokim mipela olsem a!

Tasol olsem wanem long yupela ol memba? Olgeta manmeri bilong ples nambaut ol i no save long wan wan provins, tasol long hia

em longpela samting na mipela harim i stap na yupela memba tasol i save westim mani bilong gavman na mipela i no amamas long dispela pasin. Wan wan memba i go long narapela kantri, na yupela i save yusim mani olsem K3 000 o K2 000 long wan wan man. Na yupela i save westim mani bilong kirapim ples na ol arapela samting bilong ples bilong yumi, na yupela i save westim mani nating tu. Em i no gutpela samting tru yupela memba o minista i mekim dispela kain pasin.

Planti taim yupela i save i go i kam na yupela i save westim mani bilong pipel nating. Mi yet na ol pipel long hap bilong mi i no save amamas long dispela pasin bilong yupela i go na kam. Wanem samting yupela i save go kisim long narapela kantri, em mipela i no save klia long dispela.

Tu mipela i no harim ol samting yupela i go kisim na i kam bek long pipel bilong yu long dispela na yu no save tok mi bin lukim dispela samting na i kam na yumi mas kirapim wok olsem sindaun olsem, yupela i no save tok olsem na bilong wanem tru yupela memba i save pinisim nating mani bilong gavman na pipel bilong yumi nating?

Sapos yupela i no kisim wanpela samting i kam bek long kantri na yupela i save pinisim mani bilong gavman nating tasol, laka?

Em tasol na sapos dispela toktok bilong mi i no stret orait, rait tasol i go long Wantok Niuspepa na bai mipela i ken lukim. Em tasol liklik wari bilong mi. Tenkyu tru.

Matthew Mali,
Erave/S.H.P.

SALIM OL
PAS I KAM
LONG:

WANTOK
BOX 1982
BOROKO

Engliken na Katolik sios tok long bung wantaim gen


Bipo long 500 yia i gat wanpela sios o lotu tasol i stap long Yurop. Em i Katolik Sios.

Tasol bihain, dispela bikpela sios i bruk namel na sampela arapela sios i kamap. Dispela arapela lain sios yumi save kolim talatala o Protestan. Sampela i lusim Katolik Sios bikos ol i pilim Pop, em hetman bilong Katolik Sios i gat tumas pawa.

Bihain ol dispela lain i bruk lusim Katolik Sios ol i kirapim wan wan lain bilong ol stret. Tasol Katolik Sios i stap olsem bipo na inap tude Pop i bosim em na i hetman bilong en.

Tude i gat planti kain kain Kristen Sios. Yumi kolim ol Kristen, long wagem olgeta ol i bihainim tok bilong Krais na Nupela Testamen. Na olsem tu i gat planti kain Katolik Sios i bin kamap long Papua Niugini na kirapim ol misin bilong ol.

Tasol nau, isi isi na liklik liklik, ol dispela Kristen



sios i laik bung wantaim long kain kain wok - na tu long tingting bilong ol. Hia long Papua Niugini planti i insait pinis na i memba bilong Melanesien Kaunsil bilong ol Sios. Na tu planti arapela i insait long Evanjelikal Alayans.

Long mun i go pinis long Englan, ol Engliken i bin kirapim sampela tok gen

long bung moa wantaim ol Katolik. Dispela wok bung wantaim i bin stat strong long yia 1968 na inap nau tupela sios i wan tingting pinis long bilip bilong tupela long Yukaris na tu long wok pris.

Na nau long mun i go pinis, klostu ol i wan tingting pinis long aidia bilong kain kain pawa insait long


Sios. I tru, ol Engliken i wari yet long sampela bilip bilong ol Katolik: olsem long Pop i no ken mekim asua long taim em i tisim ol pipel long samting bilong bilip. Na tu ol Engliken i no orait yet long olgeta bilip bilong Katolik Sios long Maria, mama bilong Jisias.

Tasol dispela komisin bi-

long tupela bikpela lotu i bin kibung long Englan i bin painimaut olsem: tude ol Engliken i no egens long aidia long Pop em i ken stap olsem het bisop o siaman bilong komisin bilong olgeta Engliken na Katolik bisop wantaim.

Dispela nupela tingting em i bikpela tru, namel long tupela bikpela sios. (Lukim pes 10)

TOYOTA WINIM OLGETA PMV LONG PNG



TOYOTA **EIA** 
MOTORS LIMITED

Burns
Philp
GROUP OF COMPANIES



Poto i soim Misis Margaret Obi, presiden bilong Papua Niugini Laibreri A Asosiesen, na Misi Vicki Mas - taim tupela i stap long laibreri bilong Sogeri Haiskul sampela yia bipo.

(i kam long pes 3)
kain wok laibreri long provins bilong en. Em i pilim nesenel gavman i mas wok gut na strong wantaim provinsal gavman, sapos dispela wok laibreri inap go het tru.

Na tu wanpela samting moa. Gavman i no bin makim sampela mani bilong helpim wok long bungim olgeta kain buk na pepa samting i toktok long olkain samting bilong dispela kantri na pipel bilong en. Na tu i no gat mani bilong bungim ol samting ol lokal pipel i raitim pinis. Nogut ol dispela samting i lus nating olgeta.

Skul laibreri sistem, em i gat wok long helpim ol laibreri long ol skul insait long PNG - em nau i painim bikpela wari. Planti waitman bilong dispela di-

patmen i go pinis na i no gat sampela lokal pipel bilong kisim ples bilong ol. Na tu ol haiskul i sot tru lo long ol pipel i save mekim gut wok laibreri na tu planti i no gat gutpela haus laibreri.

Gavman i bin putim ol dispela wok laibreri aninit long dipatmen bilong edukesen. Tasol ol hetman na ofisa bilong Papua Niugini Laibreri Asosiesen i pilim nau bai ol gutpela wok bilong ol i lus olgeta. Ol i pilim dipatmen bilong edukesen i no save wari na tingting long wok laibreri. Em i pilim em i gat planti arapela wok i bikpela moa.

Inap nau tu yumi no bin traim dispela pasin bilong bringim olkain buk i go nabaut long ol ples insait long wanpela ka o trak.

120 JAPAN GO HOLIDE LONG PLES

Long namba tri taim Air Niugini i bin flai i go long Kagoshima long Japan, bikpela smolbalus 707 i pulap tru long 120 ol wokman bilong Japan em ol i wok long bikpela faktori na bisnis bilong lukautim pis long Rabaul.

Tokman bilong ol i bin tok save olsem: em i pasin bilong ol man i lukautim pis na wok insait long dispela kain kampani long go bek long as ples bilong ol long taim bilong ol holidede bilong Nu Yia. Orait, sapos ol dispela wokman bilong Japan i laik sel i go

long Rabaul inap Japan long sip, bai ol i mas ran inap tupela wik. Na arapela tupela wik gen long kam bek long Rabaul. Olsem na planti taim i lus. Ol i no laik westim planti taim, olsem ol i kisim balus i go.

Taim dispela balus i kam bek long Japan long Fraide, 28 Januери, em i bringim 45 spesel pren bilong Japan em Air Niugini i bin singautim ol long kam lukluk raun long Papua Niugini. Em i lain bilong olkain bikpela bisnisman na man bilong gavman bilong Japan.



BILONG RAUSIM GRILE BILONG PIS

8-pela tuptup bilong botol; 8-pela nil, na wanpela liklik hap plang. Em tasol.

BISNIS LONG P.N.G. GO HET GUT

Mani bilong PNG i gat strong long en bikos prais bilong kopi na kakao i stap yet. Em tupela bikpela samting bilong winim mani bilong kantri. Prais bilong kopra i bin go daun liklik.

Sampela bikpela kantri i lukim dispela samting na ol i laik putim mani insait long PNG bilong mekim go het moa Bougainville Kopa, na OK Tedi kopa. Na tu sampela arapela kampani i lukaut yet long pain-

im wel aninit long graun. Na tu wel pam wok i go het gut long Popondetta na Bialla. Wok timba em i strongpela yet.

Insait long 3-pela mun inap long Septemba long yia i go pinis PNG i bin winim K126,800,000 kina long salim kopra na kakao na kopi.



WANTOK

Papua New Guineans' own national weekly in Melanesian Pidgin.

Editorial Office:

Box 1982
Boroko
Papua New Guinea
Phone: 25.2214

Branch Offices:

Box 396
Wewak
Phone: 86.2488

Box 90
Rabaul
Phone: 92.1355

Box 111
Wabag.

Printed by Wirui Press in Wewak.
Phone: 86.2479.

Overseas Advertising Representative:

Kevin Engel
8 Duraba Pl.
Caringbah (2229)
Phone: 525.6263

Subscription rate:
Annual: K8.00.

maxell

LONG LIFE BATTERIES

**For all Transistors
Torches-Tape Recorders
& Record Players**

HAGEMeyer (AUSTRALASIA) B.V.

P.O. BOX 673, MADANG Phone 82 2445	BOROKO P.O. BOX 1428 Phone 25 6144
P.O. Box 63, RABAUl Phone 92 2633	P.O. BOX 90, LAE Phone 42-3200

YUMI NO KEN SAKIM TOK BILONG DOK

Long wanpela ples i gat tupela brata, na wanpela meri. Meri em i susa bilong tupela. Na tripela ol i save stap long wanpela haus tasol. Na ol i stap.

Nau wanpela taim namba wan brata i tok, mi laik i go painim kapul long bus. Em i kisim spia banara, na pulimapim kaukau long bilum, na em i redi long i go long bus.

Orait, em i wokabaut i go na tudak i kamap, em i putim bilum kaukau long wanpela liklik haus, na em i go painim kapul long bus. Na gutpela mun lait na em i go. Nau em i lukim tripe-la kapul na i kisim i kam long haus.

Long haus em i rausim bel bilong kapul, na bihain em i rausim pekpek bilong kapul na em i kaikai bel bilong kapul na em i slip i stap. Na moningtaim em i kisim rop bilong bus na pasim tripela wantaim na karim i go long ples. Na namba tu brata na susa bilong em tupela i stap, na bihain ol i mumuim dispela kapul na ol i kaikai.

Na sampela mun i go pinis, namba wan brata i tok, mi laik i go long bus. Na wan wik samting bai mi stap long bus. Na bihain bai mi kam bek. Em i tokim tupela olsem na redim ol samting bilong kilim kapul. Na pulimapim kaukau long bilum. Na em i slip i stap. Long moning, em i kisim ol samting bilong em na i go. Orait, em i wokabaut i go i go em i go kamap long dispela maunten.

Em i sindaun long maunten, na wokim smok na i kisim win liklik na em i sindaun i stap, na em i lukluk i go long ol bus na em i lukim wanpela smok i kamap namel long bus. Na em i tingting long em i laik i go lukim dispela smok, na smok i pinis, orait em i go i go, na em i harim wanpela dok i kra i em i go, na em i lukim wanpela dok i putim lip kapiak long maus bilong em na em i kra i stap, orait boi i go kamap na dok i tok yu kam mekim wanem long hia?



stori bilong tumbuna

Dok i tok, Yu inap helpim mi? Orait em i kisim lip kapiak, ol kain kain samting bilong mumuim pik, na em i go insait long haus na i kisim bikpela pik i kam ausait.

Na boi i lukluk i stap na em kisim bikpela stik bipo em save kilim pik long en. Em i kisim dispela stik na kilim pik na bihain kukim gras bilong pik. Kukim pinis katim pik na tupela mumuim, na hap liklik ol mumuim long arapela hap. Ol sait na het bilong pik ol mumuim long hap.

Na bihain tupela i rausim pik na dok em i go kisim het bilong pik tasol. Olgeta pik em i givim long dispela boi. Na dok i tok yu karim olgeta pik i go. Em tok olsem long boi na dok i givim wanpela karamap long boi. Na dok i tok:

Yu opim dispela karamap long maunten bipo yu

sindaun long en, na boi em i go, em wokabaut i go i go kamap long dispela maunten na em i kisim dispela liklik karamap dok i givim long en. Em i kisim na opim dispela karamap na boi em i go sanap long dua bilong haus bilong en.

Nau namba tu brata na susa tupela i stap. Na tupela i tok, yu tok long yu go kilim kapul, tasol husat i givim dispela pik na yu karim i kam? Em i tok em wanpela wantok i givim. Nau namba tu brata, i tok, "Yu go na mi stap long haus oltaim. Orait, nau mi laik go lukim dispela wantok".

Na bik brata i tok, "Nogat". Na brata bilong em i kros na i no kaikai pik. Orait namba wan brata i tok tok, orait yu ken i go tumora, na yu ken redim ol samting nau bai mi amamas na kaikai pik.

Bihain ol i slip na mo-

ningtaim em i redim ol samting pinis na brata bilong em i tok: Yu no ken mekim arapela samting. Yu mas mekim olsem dok i tok. Yu mas bihainim maus bilong em. Orait em i go, i go na kamap long maunten na em i lukim smok i kamap na em i go kamap long ples smok i kamap long en. Na dok i kra i stap holim wanpela lip kapiak na ol arapela samting bilong kilim pik. Na boi i tok: Yu kisim ol samting na yu sanap tasol olsem plisman. Na em i kisim stik na paitim dok nogut tru. Na dok i ting, bipo boi i no save mekim olsem. Tasol yu kam na paitim mi nogut tru. Dok i i ting olsem, em yet i kisim pik long haus na brukim het bilong pik. Na dok i kra i stap.

Na boi i tokim dok long rausim gras bilong pik na em i tromoi lek bilong em na lek i paia olgeta, na pes bilong em tu i paia. Na em i no tanim pik na boi i kilim nogut tru na dok i sindaun kra i stap.

Na em yet i mumuim pik, na bihain em i rausim na karim olgeta pik i go, na em i kamap long haus (Lukim pes 10.)



Bank South Pacific the Personal Service Bank

WE LOOK AFTER YOUR NEEDS FOR :

- * Cheque Accounts
- * Pass Book Accounts - earning interest
- * Interest Bearing Deposits, highest rates
- * Overdrafts and Personal Loans
- * Travellers' Cheques
- * Full International Services

CONTACT OUR MANAGERS AT :

Main office: Port Moresby
Branches: Boroko Mt. Hagen
Kieta Kundiawa
Lae Rabaul

DISPELA BENG BILONG SAUT PASIFIK I
NAMBWAN BILONG LUKAUTIM MANI BILONG YU.
Yu traim

Bank of South Pacific

Incorporated in Papua New Guinea

Wanpela Katolik bisop long Englan i tok olsem: Inap nau tupela sios i sanap wantaim, wanpela i sanap arere long narapela. Tasol nau i luk olsem liklik liklik tupela sios i gro insait long narapela.

Long mun Epril Pop Pol, em hetman bilong Katolik Sios, bai sindaun toktok wantaim hetman bilong Engliken Sios, em Asbisop

Coggan bilong Canterbury. Tupela bai skruim i go moa dispela toktok na tingting bilong painim rot bilong helpim tupela sios i ken pas gen wantaim.

Pop em i gat moa pawa insait long Katolik Sios olsem Asbisop bilong Canterbury insait long Engliken Sios. Wanpela eksampel yumi ken painim insait long Papua Niugini yet.

Long Katolik Sios em Pop yet i save makim man long kamap bisop long wan wan daiosis. Long Engliken Sios i no olsem. Sios long wan wan kantri i makim ol bisop bilong en yet.

Asbisop Coggan bilong Canterbury bai kamap long Papua Niugini bilong sambai taim Engliken Sios long dispela kantri i kisim independens bilong em

long 27 Februeri. Em i min Engliken Sios hia i no moa wanpela han bilong Engliken Sios long Australia. Em i min tu, Engliken Sios hia i ken makim ol bisop bilong em yet.

Olgeta Engliken long olgeta hap bilong graun i save tingim Asbisop bilong Canterbury olsem het lida bilong ol. Olsem tasol ol Katolik i save tingim Bisop bilong Rom (em yumi kolim Pop) olsem het lida bilong ol.

ATING YU SAVE

I no gat narapela nupela kantri insait long Yunaitet Nensens i kisim moa mani na moa helpim long ol arapela kantri olsem Papua Niugini. Dispela em i naispela samting.

Tasol em i no soim olsem wanem yumi inap sanap long lek bilong yumi yet. Long dispela samting yumi no independen yet.

BAIM WANTOK

Sapos yu wanpela yu laik kisim WANTOK niuspepa i kam long yu stret, orait, yu katim dispela tiket long sisis na salim i kam wantaim K8.00 na bai yu kisim 48 taims long dispela yia.

NEM:

ADRES:

Nau yu putim sek inap long K8.00 i go wantaim dispela tiket insait long wanpela skin pas na yu salim i go long:

WANTOK
BOX 1982
BOROKO

Sapos yu laik baim moa olsem 10-pela WANTOK olgeta wik, mipela i gat spesel prais long dispela. Yu rait na askim mipela.

STORI BILONG TUMBUNA

(i kam long pes 9)

na namba wan brata i stap lukim pik na em i tok, yu no givim het bilong pik bek long dok. Na boi i tok, "Yu nupela boi, yu kisim olgeta pik i go." Em i tok olsem na mi karim i kam.

Namba wan brata i ting, em ating paitim em o kilim em samting. Em i ting olsem na em i no kaikai pik. Orait tumora bai mi go lukim. Orait na moning-taim tru em i go kamap long maunten. Na smok i no kamap long dispela ples bipo em i go long en. Na

em i krai wantaim na i go kamap long haus. Nau em i lukim dok i slip klostu long paia. Klostu em i laik indai.

Taim em i lukim dok, dispela taim em i dai na em i krai na planim. Na em i kam bek long ples na kilim brata bilong em. Na susa bilong em i go marit. Sapos namba tu brata i mekim gut long dok bai tupela inap sindaun gut, tasol boi i mekim rong na ol lain i bagarap.

Peter Kopen Muli,
Pumakos.

**Buy the brand
you can trust**

maxell®



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

P.O. Box 673, Madang
Phone: 82 2445

P.O. Box 63, Rabaul
Phone: 92 2633

P.O. Box 1428, Boroko
Phone: 25 6144

P.O. Box 90, Lae
Phone: 42 3200



I gut NBC wok bisnis o nogat

Inap sampela mun nau planti pipel i bin kirap toktok egeñs long aidia bilong NBC long statim wok bisnis wantaim ol brotkas bilong ol, long Port Moresby.

I gut yumi lukim tingting i hait bihain long ol dispela aidia.

NBC i ting olsem: em i gutpela sapos long nesene brotkas bilong ol, ol i ken larim sampela kampani i baim sampela minit taim na anaunsa i ken mekim liklik tok gris long pulim ol lisena long baim kain kain samting bilong kampani olsem sop o motobaik o ka o trak samting. Long planti kantri ol redio stesin i save mekim olsem, na olsem tasol ol i save kirapim gutpela bisnis na winim mani.

NBC i ting, em tu i ken winim mani olsem inap long baim ol wokman bilong en. Na sapos em yet inap baim ol wokman, bai em i no mas singaut long gavman oltaim long givim mani. Em NBC i laik winim mani bilong em yet, olsem ELCOM i save mekim na PNG Beng i save mekim na tu Pi en Ti i save mekim.

NBC i bin wokim pinis olkain lo bilong bosim dispela pasin bilong tok gris long redio, em yumi kolim edvetaising. Em i tambuim olgeta tok gris long pulim pipel long dringim bia o strongpela dring. Na tu em i tambuim olgeta tok gris long pulim ol lisena long baim kain kain sigaret.

Tasol Melanesien Kaunsil bilong ol Sios i ting yumi mas lukim tu arasait bilong dispela aidia. Dispela Melanesian Kaunsil i tokman na nek bilong ol Engliken, na Katolik, na Beptis, na Luteran, na Yunaitet Sios wantaim.

Siaman bilong Melanesien Kaunsil bilong ol Sios, em Pasto Leslie Boseto (hetman bilong Yunaitet Sios) i bin raitim wanpela pas i go long Dokta Reuben Taureka, Minista bilong Infomesen, na em i bin tok olsem:

"Mipela ol sios i bin harim, NBC i laik sutim

dispela kain tok gris ol i kolim edvetaising i go tasol long ol waitman na long ol lokal pipel i gat mani. Mipela ol sios i pilim dispela tingting i no stret na bai em i popaia.

"Yumi Papua Niugini i no tupela lain pipel: ol manmeri nabaut na ol susak man i gat bikpela wok na bikpela namba na i kisim bikpela pe. Ol dispela bikpela manmeri i save sindaun i stap yet namel long ol wantok i no gat planti samting. I no olsem ol i gat ples bilong ol stret long ol taun na i no gat ol manmeri nating i sindaun i stap klostu long ol. Nogat. Oltaim ol wantok i save stap klostu, o i stap insait long haus bilong ol tasol.

Na olgeta samting ol man nating i lukim dispela bikpela man bilong ol i gat, ol tu i mangalim.

"Em i longlong sapos yumi toktok planti long mekim got het ol fama na helpim sindaun bilong ol man long bus na long ples, na long redio yumi tok gris long pulim ol man bilong taun long baim olkain smatpela samting, em ol man long ples i no inap long baim. Yumi wan pipel; yumi mas kamap wankain.

"Redio i gat bikpela strong moa long tanim tingting bilong ol pipel. Ol i save bilipim olgeta tok bilong redio. Dispela pasin (Lukim pes 13.)



KRAFT CHEESE




'GUTPELA
SIS
BILONG
KAIKAI'

059 P1335

* Poto long lephan i soim anaunsa hia Mista James Kapo bilong Wabag, i ritim lokal provinsal nius insait long studio o ples bilong toktok long Redio Maun Hagen. Ating em i ritim long tok ples.

Buy the brand
you can trust



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

maxell LN C90

Low Noise Cassette Tape


P.O. Box 673, Madang
Phone: 822445

P.O. Box 63, Rabaul
Phone: 922633

P.O. Box 1428, Boroko
Phone: 56144

P.O. Box 90, Lae
Phone: 423200


DISPELA BUK I WINIM TRU OLGETA ARAPELA BUK LONG PAPUA
 NIUGINI LONG YIA 1976. KNIKTAIM TRU OL I BAIM 5000 PINIS.
 LONG YIA 1977 DISPELA BUK I BIKPELA MOA. TOK BILONG EM I
 ISI TRU LONG RITIM. EM I LONG TOK INGLIS. BIHAIN LIKLIK
 BAI I GAT WANPELA LONG TOK PISIN TU.
 HARIAP. BAIM WANPELA BILONG YU STRET. NOGUT YU LET.
 EM I KOSTIM K3.00 TASOL. MIPELA YET I BAIM STEM.



LIKLIK BUK

**A Rural Development Handbook Catalogue
 For Papua New Guinea**

English Edition 1977



*Katim dispela tiket daunbilo na salim mani i kam wantaim.
 Salim i go long: WANTOK, BOX 1982, BOROKO.*

Nau mi salim kina bilong baim kopi bilong
 LIKLIK BUK, 1977. Yupela salim i kam long:

NEM:

ADRES:

.....

Adres bilong mipela: WANTOK, BOX 1982, BOROKO

bilong grisim ol lisen bilong baim kain kain samting, em i save pulim tingting bilong ol long mangalim ol samting bilong graun na ol samting mani i ken baim. Tasol pasin bilong yumi Papua Niugini i no olsem. Yumi no save tingting tasol long bel na mani na bilas. Nogat. Yumi no save tingting long skin bilong yumi tasol; yumi save ting long famili na lain. Yumi save lukaut gut long olgeta man meri pikinini bilong famili bilong yumi: ol lapun, ol sikman, ol i no gat strong, na tu ol lesman.

"Yumi bin statim pasin bilong mekim wok long faktori na bisnis na stua bilong narapela man na winim mani. Orait, dispela pasin bilong wok mani em i kirapim wanpela nupela wari: planti man i no inap painim wok. Bipo i no gat dispela kain wari; long ples i no gat man i sot long wok.

"Nogut yumi tok: Mas-ki. Dispela pasin bilong wok mani em i kamap na i stap pinis. Mobeta yumi

bihainim nau. Tasol dispela kain tingting i no stret. God i no laik bai mani na wok mani na ol samting bilong graun i krungutim mipela. Nogat. Em i laik yumi yet i mas bosim ol dispela samting. Em i no laik samting ya i bosim yumi.

"Yumi stap hia long Papua Niugini bilong helpim ol brata. Wan wan i mas helpim wan wan; em i selp relayans. Em i min yumi mas tingting long arapela man tu, na i no long skin bilong yumi tasol. Dispela aidia bilong winim mani na ol gutpela samting bilong mi wanpela, em i no pasin bilong kalsa bilong Papua Niugini.

"Yumi save toktok long tilimautim gut ol mani na gutpela samting yumi bin winim - bai i no gat sampela man i rabis na sampela i gat planti samting. Tasol dispela wok long tok gris long, redio, em i save skrapim bel bilong ol lisen na ol i kirap mangalim planti samting ol i no inap baim, na planti samting tu i ken bagarapim laip bilong ol"



Pasto Leslie Boseto (l) wantaim Joshua Daimo na Pasto Gottfried Osei - Mensah bilong Afrika.

Pasto Boseto i tok tu long Minista: "Mipela Melanesien Kaunsil bilong ol Sios, mipela i laik bai NBC i independen. Mipela i laik NBC em i fri long tokaut olsem nek bilong ol pipel. Yes. Tasol mipela i no laikim dispela pasin bilong hangamap long mani bilong ol bisnismen. Em i no independens. Em i min em i hangamap - hangamap long laik na tingting bilong bisnis na mani."

MASKI MOA BALUS, WOKABAUT LIKLIK

Sir Tei Abal i bin pairap olsem long sampela minista bilong gavman:


"Mi ting ol minista ol i wankain tru long ol arapela memba bilong palamen. Ol i gat narapela wok tasol, na ol i save karim moa hevi bilong ranim gavman.

"Yes i tru ol i mas gat samting bilong mekim wok bilong ol. Tasol mi no bilip ol i mas gat balus bilong ol yet na bikpela ka na bikpela haus win bilong ol wiken bilong ol. Ol i mas tingting long dispela samting: klostu olgeta manmeri bilong Papua Niugini i save wokabaut long lek bilong ol yet.

Wok bilong minista bilong palamen em i bilong helpim ol pipel. Mobeta ol minista i no flai antap tumas; mobeta ol i kam daun na wokabaut long lek antap long graun olsem ol arapela pipel. I gut sapos wan wan taim ol minista bilong gavman i sanap wetim wanpela PMV olsem planti tausen arapela pipel i save mekim olgeta de."

JVC MUSICAL PLEASURE


wanpela bilong yu stret




9437



9303E/R



9302E/R



9425

Olgeta samting yu laik painim insait long wanpela kaset redio rikoda, em yu ken painim long JVC.

Ol i no hevi, ol i isi long karim nabaut. Na ol i gat gutpela lautspika tru.

Yu go lukim long Hagemeyer bai yu inap painim wanpela bilong laik bilong yu stret. Na em bai stap planti yia moa. Yu laik win, yu kisim JVC.

9302E/R For people with get-up-and-go. Rich, clear sound, automatic level control, variable sound monitor, built-in microphone, flexible 3-way power system.

9303E/R Sturdy radio cassette recorder with best quality, solid state sound reproduction. Automatic level control, cue and review facilities. Mike mixing with independent volume control.

9437 Eye catching 3 Band Radio Cassette Recorder. Push button operation, built in microphone, auto stop, tape counter, tone control, variable monitor mixing.

9425 Advanced Radio Cassette Recorder featuring 2 speakers, Powerful "5" woofer 2" tweeter cellular horn, input mixing, auto stop, tape counter, built in microphone, AC/DC operation, auto head cleaner.



DISTRIBUTED IN PAPUA NEW GUINEA BY HAGEMeyer (AUSTRALASIA) B.V.

For further information write to:-

P.O. Box 673, Madang
Phone: 822445

P.O. Box 63, Rabaul
Phone: 922633

P.O. Box 1428, Boroko
Phone: 25 6144

P.O. Box 90, Lee
Phone: 423200

JVC

The Phantom

®

By Lee Falk and Sy Barry




Glasman i tokim ol stilman.



Mi go long taun. Mi laik salim dispela daimon. Rima, yu stap. Nogat, yu no inap wokebaut.


Sori, papa...



E lapun. Yu go we?

Wanem samting i stap insait long bek?

CONT'D.



Yu go we, lapun?

Wanem samting i stap insait?

Yupela klia. Mi no laik.



Oke, mipela i klia

UH...



Papa



Rima, yu tokim huset long dispela daimon?

Long glasman tasol. Em i tok posin bilong em bai helpim yumi na daimon.



Taim tupela i paitim mi, mi lukim glasman i sanap i stap. Yumi go long polisman.

FALK & BARRY 12/9



Mi painim bikpela daimon long gaden

Glasman na tupela man nogut i stilim.

Bikpela olsem?

Wanpela daimon tru long ples klia?



Glasman, em i tok yu stilim daimon.

Em i no gat daimon. Em driman tasol.

Giaman bilong yu.



Sarap, lapun. Sapos yu no klia, bai yu tainim long rokrok

FALK & BARRY 12/10



Bai mi go long biktaun. Bai presiden i helpim mi.



* Mista Paulias Matane, tokman bilong Papua Niugini long Amerika i sainim wanpela pepa bilong kisim dinau bilong mekim go het wok edukesen insait long Papua Niugini.



* Em lain bilong ol edukesen seketeri bilong Katolik Sios insait long Papua Niugini. Oltaim yu kirap long lephan bilong painim wan wan.
Long lain i go pas: John Moipu (Aitape), Augustin Sana (Wewak), Melchior Kasap (Madang), Pater Salvator (Aitape), Ben Pulpulis (Kavieng).
Long namba tu lain: Charles Aisa (Bereina), Brata Charles (Vanimo), Sista Teresa (Aitape).
Long namba tri lain: Paul Kamit (Rabaul), Pius Mak (Mt. Hagen), Hubert Waiteli (Alotau), Adrian Keough (Madang), Theophane Nembikut (Lae).
Long namba foa lain: Josaphat Makail (Aitape), George Arua (Port Moresby), Arnold Wau (Daru). Mista Makail em i het seketeri.